



**Sumáriu Kazu**  
**Tribunál Distritál Suai**  
**Jullu 2022**

**Afirmasaun:** Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

**JSMP** kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

**A. Sumáriu prosesu julgamentu kazu iha Tribunál Distritál Suai**

**1. Totál kazu ne'ebé JSMP monitoriza :27**

Artigu	Tipu Kazu	Númeru
Artigu 145 Kódigu Penál (KP), no artigu 2,3, 35 Lei Kontra Violénsia Doméstika (LKVD)	Ofensa ba integridade física simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika no 36 kona-ba krime sira violénsia doméstika nian hanesan krime públiku)	11
Artigu 172 KP no artigu 2,3, 35 Lei Kontra Violénsia Doméstika (LKVD)	Violasaun seksuál natureza violénsia doméstika	1
Artigu 138 KP no Artigu 138 KP no 23,24 tentativa	Omisídiu simples no tentativa omisídiu simples	1
Artigu 172	Violasaun seksuál ho agravaun	1
Artigu 177 KP no artigu 2,3, 35 Lei Kontra Violénsia Doméstika (LKVD)	Abuzu seksuál ba menór natureza violénsia doméstika	1
Artigu 177 KP no artigu 182 KP	Abuzu seksuál ba menór ho agravaun	1
artigu 139 KP no no Artigu 20, nu 1, lei nu 5/2017, Arma Brankas	Omisídiu agravadu ho arma brankas	1

Artigu 1757, 1758, 1759, 1762, 1765, 1786, 1782, 1804, 1805 KS (Kódigu Sivíl)	Ezersísiu póder paternál	8
Artigu 145 KP	Ofensa ba integridade fizika simples	1
Artigu 157 KP	Ameasa	1
<b>Totál</b>		<b>27</b>

## 2. Totál desizaun ne'ebé JSMP monitoriza:23

Tipu pena	Artigu	Númeru
Suspensaun ba prizaun nia ezekusaun	Artigu 68 KP	8
Pena prizaun	Artigu 66 KP	3
Pena Multa	Artigu 67 KP	2
Omologa	Artigu 262 KPP	10
<b>Totál</b>		<b>23</b>

**Totál kazu sira ne'ebé sei kontinua tuir JSMP nia monitorizasaun: 4**

### B. Deskrisaun sumariu julgamentu desizaun ba kazu sira

#### 1. Krime ofensa ba integridade física simples ho natureza violénsia doméstika

Nú. Prosesu : 0003/22.PDSUA  
 Kompozisaun tribunál : Singular  
 Juiz : Dr. Samuel da Costa Pacheco.  
 Prokuradór : Dr. Rafael Jerónimo Gusmão  
 Defeza : Dr. Domingos dos Santos  
 Desizaun : Pena prizaun fulan 8 suspende tinan 1

Iha 01 Jullu 2022, Tribunál Distritál Suai prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu MdL hasoru nia fen, iha Munisípiu Ainaro.

#### Akuzasaun prokuradór

Prokuradór akuza katak iha 18 Dezembru 2021, iha oras tuku 15:00 lokraik, arguidu foti kadeira masa tuda ba lezada nia ren-toos no kona liman parte karuk, tebe dala rua iha kabun, buti kakorok, lezada tenta halai sai ba liur, arguidu duni tuir no foti ai-pedasuk baku dala ida iha kotuk laran. Ante ne'e sira nia oan feto ki'ik haree arguidu tanis, nune'e lezada lori sira nia oan ba arguidu hodi kous sira nia oan, maibé arguidu lakohi no sira diskute malu, arguidu nerbozu no komete krime hirak ne'e hasoru lezada.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa konjuga ho artigu 2, 3 (a), 35 (b) no 36 LKVD.

#### Produsaun ba prova sira

Iha julgamentu, arguidu konfesa faktu sira iha akuzasaun no deklarata katak agora dadaun ne'e sira di'ak malu ona no agora nafatin hela hamutuk iha uma ida hanesan feen-la'en, arguidu rekuñese ninia hahalok ne'e ladi'ak, promete futuru sei larepete tan hahalok hanesan hasoru lezada inklui ema seluk.

Alende ne'e, lezada kontinua konfirma faktu hotu iha akuzasaun no reforsa katak ho arguidu di'ak malu ona no to'o agora la iha problema seluk no hela hamutuk iha uma ida nafatin, lezada deklarata tan katak perdua arguidu ninia hahalok.

### **Alegasaun finál**

Prokuradór haktuir katak arguidu provadu komete krime ofensa ba integridade física simples ho natureza violénsia doméstika hasoru lezada bazeia ba arguidu nia konfisaun no konfirma husi lezada. Mesmu sira dia'k malu ona, maibé prokuradór haree katak krime violénsia doméstika aas tebes, nune'e husu ba tribunál atu kondena arguidu ho pena suspensaun.

Entretantu defeza husu ba tribunál atu aplika tuir tribunál nia konviksaun bazeia ba prova sira ne'ebé produs iha julgamentu no husu ba tribunál atu konsidera mós sirkunstansia atenuante sira hanesan arguidu konfesa, arrepende, rekoñese nia hahalok, promete sei la halo tan hahalok hanesan ne'e hasoru lezada iha futuru no arguidu mós foin primeiravéz mai hatan iha tribunál.

### **Desizaun**

Depoisde avalia faktu sira hotu, tribunál prova katak arguidu lori kadeira plastiku tuda lezada kona iha lezada nia ren-toos no liman parte karuk, tebe dala rua iha kabun, buti lezada nia kakorok no lezada halai ba uma liur arguidu duni tuir lezada foti ai-pedasuk baku dala ida iha kotuk laran. Bazeia ba faktu provadu sira ne'e no tetu mós sirkuntánsia atenuante sira hanesan, arguidu foin mak mai hatan iha tribunál, arrepende nia hahalok no agora di'ak malu ona ho lezada, nune'e tribunál konklui prosesu no kondena arguidu ho pena prizaun fulan ualu suspende tinan ida.

## **2. Krime violasaun seksuál ho agravasaun**

Nú. Prosesu	: 0003/22.ANMBS
Kompozisaun tribunál	: Koletivu
Juis	: Dra. Patricia de Araújo Fatima Barreto Magno Xavier no Dr. Samuel da Costa Pacheco, Dr. Benjamin Barros.
Prokuradór	: Dr. Gustavo da Silva
Defeza	: Dr. Domingos do Santos
Desizaun	: Pena prizaun tinan 12

Iha 04 Jullu 2022, Tribunál Distritál Suai prezide julgamentu leitura akordaun ba krime violasaun seksuál ho agravasaun ne'ebé envolve arguidu MCL hasoru Lezada NM, iha Munisípiu Ainaro.

### **Akuzasaun prokuradór**

Prokuradór akuza katak iha 25 Abril 2022, iha oras tuku 15:00 lokraik, lezada sai husi uma ba buka fahi nia hahan iha to'os laran ne'ebé dook husi uma, bainhira lezada atu fila ba uma no iha dalan hetan arguidu ka'er hela katana no hamri'ik iha kafé laran, lezada kontinua la'ó no komprimenta arguidu, hafoin lezada kontinua la'ó, arguidu husi kotuk ka'er lezada nia liman no rasta lezada tama ba kafé laran no silu tiha lezada liman ba kotuk no riba lezada ba rai no kontinua hanehan lezada ba rai no obriga rasta sai lezada nia rounpa, lezada tenta atu hakilar, maibé arguidu taka metin lezada nia ibun no ameasa dehan '*se ó hakilar ha'u taa mate ó*', lezada tauk no nonok de'it, hafoinarguidu mós hasai nia rounpa no halo relasaun seksuál ho lezada. Arguidu nia hahalok ne'e halo lezada nia orgaun seksuál sente moras.

Prokuradór akuza arguidu kontra artigu 172 KP kona-ba violasaun seksuál ho moldura penál tinan 5 too tinan 15 no artigu 173 KP kona-ba agravasaun ho moldura penál tinan 5 too tinan 20.

### **Produsaun ba prova sira**

Iha julgamentu, arguidu konfesa ba faktu hotu iha akuzasaun no deklarata katak durante ne'e arguidu ninia talas ho lakeru dikin sempre lakon hela de'it iha ninia kintal, arguidu deklarata tan katak momentu arguidu ka'er toman lezada ne'ebé iha arguidu nia kintal no fokit hela talas ho lakeru mak arguidu nerboju no komete krime ne'e hasoru lezada. Arguidu deklarata katak arrepende ninia hahalok no promete sei lakomete tan krime iha futuru.

Alende ne'e, lezada kontinua konfirma faktu hotu iha akuzasaun no deklarata katak depoisde relasaun seksuál arguidu ameasa tan lezada katak "*se ó hateten sai problema ne'e hau sei taa mate ó*", lezada haktuir tan katak depoisde ameasa arguidu hatais nia rounpa fila ba nia uma no lezada mós hamri'ik hatais nia rounpa no la'ó fila tuir dalan tanis, maibé ran sai nafatin husi lezada nia orgaun seksuál no lezada to'o iha uma konta sai problema ne'e ba nia inan-aman, hafoin sira ba hato'o keixa iha edifisiu PNTL.

Tanba iha produsaun ba prova arguidu konfesa ba faktu prinsipál sira iha kuzasaun, nune'e prokuradór husu ba tribunál atu presinde testemuña nia depoimentu no husi parte defeza mós konkorda ho pedidu ne'e. Tanba ne'e tribunál presinde hodi la rona testemuña nia depoimentu iha prosesu ne'e.

### **Alegasaun finál**

Prokuradór konsidera arguidu provadu komete krime violasaun seksuál ho agravasaun hasoru lezada bazeia ba arguidu nia deklarasaun no lezada mós kontinua konfirma faktu sira iha akuzasaun, bazeia mós prova husi médiku ne'ebé hatudu katak lezada nia orgaun seksuál kanek no lakon nia virjinidadade. Tanba ne'e husu ba tribunál atu kondena arguidu ho pena prizaun labele menus liu tinan 15.

Entretantu defeza husu ba tribunál atu aplika tuir tribunál nia konviksaun, maibé husu ba tribunál atu konsidera mós sirkunstansia atenuante sira hanesan arguidu konfesa, arrepende nia hahalok no foin primeiravés mai hatan iha tribunál.

## **Desizaun**

Depoisde avalia faktu hotu, tribunál prova katak arguidu komete krime violasaun seksuál hasoru lezada NM, ne'ebé arguidu rasik konfesa no konfirma husi lezada. Tribunál mós tetu sirkuntansia hotu-hotu ne'ebé haleu krime ne'e, nune'e tribunál konklui prosesu no kondena arguidu ho pena prizaun tinan sanolu resin rua.

### **3. Krime ofensa ba integridade física simples ho natureza violénsia doméstika**

Nú. Prosesu : 0085/21.PDSUA  
Kompozisaun tribunál : Singular  
Juis : Dra. Patricia de Araújo Fatima Barreto Magno Xavier.  
Prokuradór : Dr. Gustavo da Silva  
Defeza : Dr. Domingos dos Santos  
Desizaun : Pena prizaun fulan 6 suspende tinan 1

Iha 05 Julu 2022, Tribunál Distritál Suai prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu EA hasoru nia fen, iha Munisípiu Covalima.

### **Akuzasaun prokuradór**

Prokurador akuza katak loron la apura maibé iha fulan Agostu 2022, iha oras tuku 20:00 kalan, arguidu basa dala lima iha lezada nia hasan parte karuk, rasta fuuk halo lezada monu tun ba rai no rasta lezada halo lezada nia ain tuur parte loos kanek. Antes ne'e arguidu fila husi natar ba uma maibé lezada la prepara hahan kalan nian, nune'e arguidu ho lezada diskute malu, arguidu nerboju no komete krime hirak ne'e hasoru lezada.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa konjuga ho artigu 2, 3 (a), 35 (b) no 36 LKVD.

### **Produsaun ba prova sira**

Iha prosesu julgamentu arguidu nega faktu hotu iha akuzasaun no deklarara katak durante moris hamutuk ho lezada desde iha tinan 1995 arguidu nunka baku lezada to'o ohin loron, arguidu deklarara tan katak iha tinan 2021 moris sapara ho lezada no iha fulan Abril 2022, família rua tuur hamutuk hodi rezolve sira nia problema no ikus sira nain rua hela hamutuk fali hanesan feen-laen.

Alende ne'e, lezada kontinua konfirma faktu sira iha akuzasaun no deklarara katak arguidu ho lezada di'ak malu ona, to'o agora arguidu la baku ona lezada no agora moris hamutuk fila fali iha uma ida.

### **Alegasaun finál**

Prokuradór konsidera arguidu provadu komete krime ofensa ba integridade física simples ho natureza violénsia doméstika hasoru lezada, mesmu iha julgamentu arguidu nega faktu sira maibé lezada kontinua konfirma faktu sira hotu iha akuzasaun, nune'e husu ba tribunál atu apresia lezada nia deklarasaun no kondena arguidu ho pena prizaun tinan ida fulan neen no suspende ba tinan rua. Alende ne'e husu mós ba tribunál banhira hatun

sentensa ba arguidu no notifika kedan arguidu nia superior iha Postu Administrativu Fatululik tanba arguidu funsionáriu públiku adminstrasaun refere.

Entretantu defeza husu ba tribunál atu aplika pena tuir tribunál nia konviksaun bazeia ba prova sira ne'ebé produs iha julgamentu laran no husu ba tribunál atu konsidera mós sirkunstansia atenuante sira hotu.

### **Desizaun**

Depoisde avalia faktu sira hotu, tribunál konsidera arguidu provadu komete krime hirak ne'e hasoru lezada nu'udar ninia feen. Bazeai ba faktu provadu sira ne'e no tetu mós sirkunstansia hotu-hotu ne'ebé haleu hela iha krime ne'e. Nune'e tribunál konklui prosesu ne'e no kondena arguidu ho pena prizaun fulan neen suspende tinan ida.

### **4. Krime ofensa ba integridade física simples ho natureza violéncia doméstika**

Nú. Prosesu : 0068/21.CVSUI  
Kompozisaun tribunál : Singular  
Juiz : Dra. Patricia de Araújo Fatima Barreto Magno Xavier.  
Prokuradór : Dr. Gustavo da Silva  
Defeza : Dr. Angelmo Pinto  
Desizaun : Pena prizaun fulan 6 suspende tinan 1 fulan 6

Iha 05 Julu 2022, Tribunál Distritál Suai prezide julgamentu leitura sentensa ba krime ofensa ba integridade física simples ho natureza violéncia doméstika ne'ebé envolve arguidu NdJ hasoru nia fen, iha Munisípiu Covalima.

### **Akuzasaun prokuradór**

Prokuradór akuza katak iha 17 Setembru 2021, iha oras tuku 16:30 lokraik, arguidu lori ai-naton ida baku dala ida iha lezada kabas parte loos, dala rua iha kotuk laran no kontinua tuku dala barak iha lezada nia kotuk laran rezulta lezada monu tun ba rai no arguidu kontinua tebe, tuku dala barak iha lezada nia kotuk laran. Antes ne'e lezada husu osan US\$ 50.00 iha arguidu atu halo lia inagura uma lisan, maibé arguidu la fó osan no diskute malu fali ho lezada, arguidu nerboju no komete krime ofensa ba integridade fizika simples forma violéncia doméstika hasoru lezada.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa konjuga ho artigu 2, 3 (a), 35 (b) no 36 LKVD.

### **Produsaun ba prova sira**

Iha julgamentu, arguidu konfesa ba faktu sira iha akuzasaun no deklara katak arrepende nia hahalok, rekoñese nia hahalok ne'e la di'ak, promete sei lakome tan krime hasoru lezada iha futuru, depoisde akontesimentu arguidu husu deskulpa ba lezada, lezada mós simu no agora di'ak malu no hela hamutuk iha uma hanesan feen-la'en.

Arguidu konfesa faktu hotu, nune'e prokuradór no defeza husu atu presinde lezada no testemuña, no tribunál mós konkorda hodi la rona tan lezada no testemuña.

## **Alegasaun finál**

Prokuradór, haktuir katak arguidu provadu komete krime ofensa ba integridade fizika simples forma violénsia doméstika hasoru lezada, mesmu sira dí'ak malu ona no hela hamutuk, maibé tu halo prevensaun iha futuru, husu ba tribunál atu kondena arguidu tuir konfiksaun tribunál nian.

Entretantu, defeza husu ba tribunál atu aplika tuir tribunál nia konviksaun bazeia ba prova sira ne'ebé produs iha julgamentu laran no atu haree sirkunstánsia atenuante sira hotu.

## **Desizaun**

Depoisde avalia faktu sira hotu, tribunál prova katak arguidu lori ai baku dala ida iha lezada nia kabas parte loos, baku dala rua iha kotuk laran, tuku dala barak iha kotuk laran rezulta lezada monu tun ba rai no arguidu kontinua tebe no tuku dala barak iha lezada nia kotuk laran. Bazeia ba faktu provadu sira ne'e no tetu mós sirkuntánsia atenuante no agravante sira, nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida fulan neen.

## **5. Krime ofensa ba integridade fizika simples ho natureza violénsia doméstika**

Nú prosesu : 0033/22. BBMLV  
Kompozisaun Tribunál : Singulár  
Juis : Dr. Samuel da Costa Pacheco  
Prokuradór : Dr. Rafael Jeronimo Gusmão  
Defeza : Dr. Domingos dos Santos  
Desizaun : Pena prizaun fulan 3 suspende tinan 1

Iha 07 Jullu 2022, Tribunál Distritál Suai prezide julgamentu leitura sentensa ba krime ofensa ba integridade fízika simples ho natureza violénsia doméstika envolve arguidu DG hasoru lezada MdA nu'udar nia eis feen, iha Munisípiu Bobonaro.

## **Akuzasaun prokuradór**

Prokuradór akuza katak iha 03 Abril 2022 iha oras tuku 9:23 dadee, arguidu uza kapasete baku dala tolu iha lezada nia ulun. Antes ne'e arguidu telefone lezada, maibé lezada la atende telefone nune'e arguidu husi uma ba iha lezada nia *kioske* no halo agreasaun hirak ne'e hasoru lezada.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa, konjuga artigu 2, 3 (a), 35 (b) no 36 LKVD.

## **Produsaun ba prova sira**

Iha prosesu julgamentu arguidu nega faku hotu iha akuzasaun, arguidu deklara katak momentu akontese ne'e arguidu ba duni lezada nia kioske hasoru ninia oan sira, arguidu rejenta labaku lezada momentu iha ne'eba, arguidu deklara katak foin primeiravés mai hatan iha tribunál, arguidu haktuir katak moris separadu ona ho lezada. Alende ne'e lezada kontinua konfirma faktu hotu iha akuzasaun no konfirma lezada moris separadu ona ho arguidu.

## **Alegasaun final**

Prokuradór haktuir katak, mesmu iha julgamentu arguidu nega faktu, maibé lezada konfirma faktu hotu, nune'e husu ba tribunál atu kondena arguidu tuir koniksaun tribunál nian.

Alenden ne'e, defeza mós husu ba tribunál atu deside tuir konfiksaun tribunál nian.

## **Desizaun**

Depoisde avalia faktu sira hotu, tribunál prova katak arguidu ka'er kapasete baku dala tolu iha lezada nia ulun. Bazeia ba prova sira ne'e no tetu mós sirkuntánsia sira hotu, nune'e tribunál konklui prosesu ne'e no kondena arguidu ho pena prizaun fulan tolu suspende tinan ida.

## **6. Krime ofensa ba integridade fizika simples ho natureza violénsia doméstika**

Nú prosesu : 0025/20.PDSUA  
Kompozisaun Tribunál : Singulár  
Juis : Dr. Samuel da Costa Pacheco  
Prokuradór : Dr. Rafael Jeronimo Gusmão  
Defeza : Dr. Domingos dos Santos  
Desizaun : Pena prizaun fulan 3 Suspende tinan 1

Iha 07 Jullu 2022, Tribunál Distritál Suai prezide julgamentu leitura sentensa ba krime ofensa ba integridade fizika simples ho natureza violénsia doméstika envolve arguidu JP hasoru lezada nu'udar nia eis feen PdS, iha Munisípiu Ainaro.

## **Akuzasaun prokuradór**

Prokuradór akuza katak iha loron no fulan la apura maibé iha 2020 no oras mós la apura, arguidu buti lezada nia kakorok riba ba kama leten rejulta moras no mean. Antes ne'e arguidu ho lezada diskute malu kona-ba ai-teka, arguidu nerboju komete krime ne'e hasoru lezada.

Prokuradór akuza arguidu kontra krime artigu 145 KP kona-ba ofensa integridade fizika simples ho moldura penál tinan 3 ka multa, konjuga artigu 2, 3 (b), 35 (b) no 36 LKVD.

## **Produsaun ba prova sira**

Iha julgamentu, arguidu nega faktu hotu iha akuzasaun no deklara katak sira diskute malu kona-ba ai-teka ne'e loos, maibé arguidu la buti lezada nia kakorok iha momentu ne'eba, arguidu foin primeiravés mai hatan iha tribunál no agora dadaun ne'e moris separadu ona ho lezada.

Alende ne'e, lezada kontinua konfirma faktu hotu iha akuzasaun no deklara katak moris separadu ona ho arguidu.

## **Alegasaun finál**



Prokuradór, konsidera arguidu komete krime ne'e hasoru lezada, mesmu arguidu nega faktu sira maibé lezada kontinua konfirma faktu iha akuzasaun, nune'e husu ba tribunál atu kondena arguidu tuir konfiksaun tribunál nian.

Entretantu, defeza mós haktuir katak husu ba tribunál atu kondena arguidu tuir konfiksaun tribunál nian.

### **Desizaun**

Depoisde avalia faktu sira hotu, tribunál prova arguidu buti lezada nia kakorok riba ba kama leten rejulta moras. Bazeia ba faktu sira ne'e no tetu sirkuntánsia hotu-hotu ne'ebé haleu krime, nune'e tribunál konklui prosesu ne'e no kondena arguidu pena prizaun fulan tolu suspende tinan ida.

### **7. Krime ofensa ba integridade fizika simples ho natureza violénsia doméstika**

Nú prosesu : 0011/22. CVSLL  
Kompozisaun Tribunál : Singulár  
Juis : Dr. Samuel da Costa Pacheco  
Prokuradór : Dr. Rafael Jeronimo Gusmão  
Defeza : Dr. Domingos dos Santos  
Desizaun : Pena prizaun fulan 6 suspende tinan 1

Iha 08 Julu 2022, Tribunál Distritál Suai prezide julgamentu leitura sentensa ba krime ofensa ba integridade fizika simples ho natureza violénsia doméstika envolve arguidu DGTK hasoru nia feen, iha Munisípiu Covalima.

### **Akuzasaun prokuradór**

Prokuradór akuza katak iha 24 Marsu 2022, tuku 19:00 kalan, arguidu basa dala rua iha lezada nia hasan parte karuk no parte loos no basa dala barak iha kanuruk.

Akontese tuir mai iha 25 Marsu 2022, iha oras tuku 20:00 kalan, arguidu tebe lezada nia kotuk laran, basa dala barak iha lezada nia hasan parte karuk no tuku dala tolu iha lezada nia ulun. Antes ne'e arguidu deskonfia lezada amante ho mane seluk nune'e arguidu husu lezada maibé lezada hakilar hasoru arguidu nune'e arguidu nerboju no halo agreasaun hirak ne'e hasoru lezada.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa, konjuga artigu 2, 3 (b), 35 (b) no 36 LKVD.

### **Produsaun ba prova sira**

Iha prosesu julgamentu, arguidu konfirma faktu hotu iha akuzasaun no deklara katak arrepende nia hahalok, promete sei la repete hahalok ne'e iha futuru hasoru lezada no ema seluk, foin primeiravéz mai hatan iha tribunál, di'ak malu ona ho lezada no hela hamutuk nafatin iha uma ida hanesan feen-la'en.

Alende ne'e, lezada kontinua konfirma faktu hotu iha akuzasaun no konfirma sira di'ak malu ona no arguidu to'o agora labaku ona lezada, lezada deklara tan katak futuru arguidu baku tan, sei kesar arguidu.

### **Alegasaun final**

Prokurador, haktuir katak arguidu provadu komete krime hasoru lezada tuir faktu iha akuzasaun, arguidu rasik konfesa no kofirma husi lezada. Bazeia ba faktu provadu hirak ne'e no tetu mos sirkunstansia sira hotu nune'e husu ba tribunál atu kondena arguidu ho pena prizaun tinan ida suspende ba tinan ida.

Enkuantu, defeza husu ba tribunál atu aplika pena multa ba arguidu, tanba arguidu foin primeiravés mai hatan iha tribunál no arrepende ninia hahalok.

### **Desizaun**

Depoisde avalia faktu sira hotu, tribunál prova arguidu tebe lezada nia kotuk laran, basa dala barak iha hasan parte karuk no tuku dala tolu iha lezada nia ulun. Bazeia ba faktu sira ne'e no tetu mos sirkunstansia atenuante sira hanesan arguidu arrepende nia hahalok, foin primenravés mai hatan iha tribunál no depoisde akontesimentu la iha ona problema seluk no agora hela mutuk nafatin, nune'e tribunál konklui no kondena arguidu ba pena prizaun fulan neen suspende tinan ida.

### **8. Krime Omisídiu Agravadu no Arma Branka**

Nú. Prosesu : 0004/22. ANHTB  
Kompozisaun tribunál : Koletivu  
Juiz : Dr. Benjamin Barros, Dr. Samuel da Costa Pacheco no  
Dra. Patricia de Araújo Fatima Barreto Magno Xavier  
Prokuradór : Dr. Gustavo da Silva  
Defeza : Dr. Ismail Assunção Lopes (Advogadu Privadu).  
Desizaun : Pena prizaun tinan 8

Iha 08 Jullu 2022, Tribunál Distritál Suai prezide julgamentu leitura akordaun ba krime omisídiu agravadu no arma brankas ne'ebé envolve arguidu Eugenio de Araújo hasoru lezadu Manuel Pereira (mate-bian), iha Munisípiu Ainaro.

### **Akuzasaun prokuradór**

Prokurador akuza katak iha 02 Marsu 2022, iha oras tuku 13:30 meiodia, arguidu ka'er katana maubeka ida taa lezadu nia ulun, hafoin lezadu konsegue hakoak arguidu no riba malu ba rai no lezadu mak iha okos, tuir mai arguidu foti tan katana no ko'a tiha lezadu nia kakorok to'o kotu hafoin foti lezadu nia ulun tara iha aikakeu leten no arguidu fila fali ba lezadu nia monu fatin taa dala barak tan lezadu nia liman no ain. Antes problema ne'e arguidu ho lezadu iha problema seluk.

Prokuradór akuza arguidu kontra atigu 139 KP kona-ba omisídiu agravadu ho moldura penál tinan 12 too tinan 25 konjuga ho artigu 20, nu 1, lei nú 5/2017, Arma Brankas.

### **Produsaun ba prova sira**

Iha prosesu julgamentu, arguidu konfesa parsialmente ba faktu sira iha akuzasaun, arguidu deklara katak momentu akontesimentu ne'e arguidu ba toos haree nia bibi no derepente lezadu haksoit husi kotuk taa arguidu, maibé arguidu haksoit ses-an no la konsegue taa kona arguidu hafoin lezadu halai fila ba nia tian nia uma.

Bainhira arguidu atu fila ba uma no besik lezadu nia tian nia uma lezadu rona arguidu nia lian, nune'e lezadu haksoit sai husi uma no foti fatuk tuda arguidu maibé la kona, lezadu ta'uk no halai ba subar iha ninia tian nia haris fatin no arguidu tuir lori besi kanu satan tiha odamatan no arguidu kontaktu ba iha parte PNTL no fó hatene ba Komandante Polísia ne'e dehan *'agora imi mai lalais ona tanba problema ida akontese iha hau nia uma, maibé komandante hatan katak ami agora dadaun ne'e labele ba iha fatin akontesementu tanba ami hein hela kaixa votasaun nian no ora-oras tan mak ami tesik ba*. Iha tempu hanesan lezadu sai husi kalen leten no tun taa arguidu maibé arguidu satan ho besi kanu no lezadu nia katana monu lezadu mós halai. Arguidu mós duni tuir, toman lezadu iha mota no taa kedas dala ida iha lezadu nia ulun rezulta lezadu monu tun ba rai no lezada hakuak (kohi) malu ho arguidu no arguidu foti katana ko'a tiha lezadu nia kakorok no lori ba tara iha aikakeu leten. Arguidu deklara depoisde fila mai tetak tan lezadu nia liman ain dala barak tanba antes ne'e lezadu mós promete atu oho arguidu no ko'a tiha nia kakorok no atu tara. Arguidu deklara liu tan katak antes ne'e lezadu ameasa bebeik arguidu no atu oho arguidu. Arguidu deklara katak dala ruma hasoru lezadu arguidu mak ses husi dalan tanba ta'uk lezadu.

Entretantu testemuña Armindo Rojario de Araújo nu'udar PNTL, depoimenta katak momentu akontesimentu ne'e testemuña hetan kontaktu husi Ajente Sr. Sabino de Araujo hodi informa katak *'ema oho malu iha suku Nunumoge*, nune'e testemuña informa ba iha komandu no ba kedas iha fatin akontesimentu no haree vítima nia mate isin no vítima nia ulun ne'ebé tara aikakeu leten dook husi vítima nia isin loloon. Testemuña haktuir katak antes fulan rua ba kotuk arguidu telefone, hodi fó hatene vítima Manuel buka hela de'it arguidu no testemuña informa ba arguidu katak, karik nia ameasa nafatin ba hato'o keixa.

Testemuña Sabino de Araújo nu'udar membru PNTL, depoimenta katak momentu akontesimentu testemuña hetan kontaktu husi arguidu hodi fó hatene dehan, *'hau oho tiha ona ema*, nune'e testemuña rona ida ne'e no kontaktu ba iha Komandu Munisípiu no ho testemuña ba iha fatin akontesimentu hodi haree lezadu nia mate isin, testemuña depoimenta tan katak iha fulan rua ba kotuk arguidu telefone testemuña no hatete katak *lezadu Manuel sai husi prizaun mai iha ne'e no dala ruma nia mai ameasa hau no testemuña fó hatene ba arguidu atu arguidu ba hato'o keixa de'it*.

Testemuña Geraldo da Silva nu'udar Ofisiál Polísia Suku (OPS) iha Suku Nunumoge, depoimenta katak iha loron la-apura fulan Abril 2021, testemuña rasik mak halo mediasaun entre arguidu ho vítima maibé iha momentu ne'ebá vítima rasik la marka prezensa no vítima nia inan de'it mak ba, testemuña haktuir katak iha prosesu mediasaun ne'e vítima Manuel nia inan dehan *"se banhira arguidu Eugenio mak ta'a mate vítima mós ita ba hakoi no vítima mak oho arguidu Eugenio mate mós ita ba hakoi hotu"*

Testemuña Martina da Silva nu'udar vítima nia tian rasik, depoimenta katak momentu akotesimentu vítima ba iha uma no testemuña halo kafé ba vítima hemu, iha momentu ne'e testemuña vítima ka'er mós ho katana ida, testemuña haktuir katak bainhira vítima hemu hotu kafé no sai husi uma dehan atu ba haris fatin, testemuña haktuir liu tan katak depoisde ida ne'e testemuña lahatene tuir ona saida mak akontese iha li'ur.

### **Alegasaun finál**

Prokuradór konsidera arguidu komete krime omísidiu agravadu no arma brankas hasoru vítima bazeia ba arguidu nia deklarasaun ne'ebé konfesa ba faktu prinsipal sira, arguidu mós fó justifikasaun oho vítima tanba bainhira vítima sai husi komarka vítima sempre ba ameasa hela de'it arguidu no bazeia mós ba testemuña Sabino nia depoimentu vítima ameasa bebeik arguidu Eugenio. Nuneé mós bazeia ba testemuña Geraldo da Silva nia depoimentu katak vítima nia inan ko'alia ba nia katak *se bainhira arguidu ba buka vítama taa mate vítima ita hakoi no kaundu vítima mak ba buka arguidu ta'a mate mós ita ba hakoi hotu*, ho buat hirak ne'e tuir loloos arguidu rasik bele hadok ka ses-an husi vítima atu nune'e labele akontese krime maibé arguidu mós hatene no hakarak atu oho mate mós vítima Manuel. Ho deklarasaun hirak ne'e prokuradór bazeia mós ba prova sira hanesan relatóriu médiku husi autopsia no fotografia husi autus. Tanba ne'e husu ba tribunál atu kondena arguidu ho pena prizaun labele bo'ot liu tinan 25.

Entretantu, defeza husu ba tribunál atu absolve arguidu tanba iha altura ne'eba arguidu ezerse nia direitu hodi halo lejitima defeza ba nia an. Bazeia ba artigu 44 KP kona-ba lejitima defeza no bazeia mós ba artigu 43 nú. 2 KP kona-ba eksklusuun ba ilisitu, nune'e tuir defeza nia intendimentu se bainhira arguidu mak la lori katana hodi oho vítima, iha momentu ne'eba arguidu mak bele mate fali tanba hetan ameasa bebeik no asalta husi vítima rasik, bazeia ba deklarasaun arguidu nian no testemuña Sabino no Geraldo ne'ebé produs iha julgamentu.

### **Desizaun**

Depoisde avalia faktu sira hotu, tribunál prova katak arguidu komete krime omísidiu agravadu no arma brankas. Bazeia ba faktu provadu sira no tetu mós sirkunstánsia atenuante sira hanesan arguidu fon primeiravés mai hatan iha tribunál no antes ne'e arguidu hakarak resolve problema maibé lezadu lakohi no lezadu nafatin ameasa bebeik arguidu, nune'e tribunál konklui prosesu ne'e no kondena arguidu ho pena prizaun ba krime omísidiu agravadu tinan ualu, enkuantu ba krime arma brankas tinan tolu nohalo akumulasaun ba krime rua ne'e ba tinan 11 prizaun, husi ne'e tribunál konklui prosesu ne'e no kondena arguidu ho pena únika tinan ualu.

### **9. Krime ofensa ba integridade física simples natureza violéncia doméstika**

Nú Prosesu : 0002/22.ANANV  
Kompozisaun Tribunal : Singulár  
Juis : Dr. Samuel da Costa Paicheco  
Prokuradór : Dr. Rafael Jeronimo Gusmão  
Defeza : Dr. Angelmo Pinto  
Desizaun : Pena prizaun tinan 1 Suspende ba tinan 2

Iha 15 Jullu 2022, Tribunál Distritál Suia prezide julgamentu leitura sentensa ba krime ofensa ba integridade fizika simples ho natureza violénsia doméstika envolve arguidu AR hasoru lezada nia feen SdC no nia oan fetu MDLR no MAR, iha Munisípiu Ainaro.

### **Akuzasaun prokuradór**

Prokuradór akuza katak iha 17 Feveireiru 2022, iha oras tuku 17:16 lokraik, arguidu basa dala ida iha lezada SdC nia hasan rejultaibun kanek no ran sai barak, hafoin lezada MDLR ho MAR ba satan arguidu, maibé arguidu foti ai-sanak baku dala ida iha lezada MAR nia ain kabun no baku dala ida iha lezada MDLR nia kabas rezulta moras no mean. Antes ne'e arguidu fila husi Fatu-Udu haree nia manu aman ida mate tiha no husu ba lezada SdC maibé lezada hatan dehan '*manu mate ona ne'e, mate ona to'o*', arguidu nerbozu komete krime hirak ne'e hasoru lezada sira.

Prokuradór akuza arguidu kontra artigu 145 KP kona-ba ofensa integridade fizika simples ho moldura penál tinan 3 ka multa konjuga ho artigu 2, 3 (b,c) 35, (b) no 36 LKVD.

### **Produsaun ba prova sira**

Iha julgamentu, arguidu konfesa integralmente ba faktu hotu iha akuzasaun no deklarata katak baku ninia feen ho oan ladi'ak, arguidu deklarata liu tan katak arrepende nia hahalok, foin mak mai hatan iha tribunál no promete futuru sei labaku lezada sira.

Ho arguidu nia konviksaun parte autór sira deside la rona lezada sira.

### **Alegasaun finál**

Prokuradór, haktuir katak arguidu komete krime ofensa ba integridade fízika simples ho natureza violénsia doméstika hasoru ninia feen ho oan sira, mesmu iha julgamentu ne'e arguidu konfesa no promete sei larepete ninia hahalok hanesan iha futuru, maibé prokuradór haree katak arguidu ho lezada sira hela hamutuk nafatin nune'e iha possibilidade krime foun bele mosu fali, ho razaun hirka ne'e prokuradór husu ba tribunál atu kondena arguidu tuir artigu 145 KP.

Entretantu defeza haktuir katak perante julgamentu arguidu konfesa faktu hotu no arrepende ninia hahalok no promete sei larepete hahalok hahalok hanesan iha futuru, nune'e husu ba tribunál atu kondena arguidu tuir konviksaun tribunál nian.

### **Desizaun**

Depoisde avalia faktu sira hotu, tribunál prova katak arguidu komete krime ofensa ba integridade fízika simples natureza violénsia doméstika hasoru lezada ninia feen no oan sira. Bazeia ba faktu provadu sira ne'e no tetu sirkunstánsia atenuante sira hotu, nune'e tribunál konklui prosesu ne'e no kondena arguidu ho pena unika tinan ida suspende ba tinan rua.

### **10. Kazu Sivíl regulasaun ba ezersísiu podér paternal**

Nú.Prosesu	: 0032/22.CVTDS
Kompozisaun Tribunál	: Singulár
Juis	: Dr. Eusébio Xavier Victor

Prokuradór : Dr. Rafael Jeronimo Gusmão  
Defeza : Dr. Domingos dos Santos  
Desizau : Omologa dezisténsia keixa

Iha 20 Jullu 2022, Tribunál Distritál Suai prezide julgamentu tentativa konsiliaun ba kazu regulasaun ezersísiu podér paternál ne'ebé envolve autór EMdSL (idade tinan 3), hasoru rekeridu DdS no rekerida MCL nu'udar autór/menór nia inan-aman, iha Munisípiu Covalima.

### **Termu no fundamentu sira**

Iha 2020, rekerida sai husi uma ba fali ninia inan aman, tanba rekeridu ninia família haree rekerida ladi'ak, tuir mai família rua tuur hamutuk hodi resolve, maibé la iha solusaun nune'e rekeridu no rekerida separa, bainhira rekeridu no rekerida separa, rekeridu nunka ba vizita menór no la fó alimentasaun ba menór sira nia oan, tuir mai menór liu husi representante prokuradór hatama asaun ida ne'e hodi kontra rekeridu, nune'e rekeridu bele fó alimentasaun ba menór, rekeridu hanesan motorista iha Ministeriu Slidaridade Sosiál kada fulan vensimentu US\$ 192.00.

### **Tentativa konsiliaun**

Iha prosesu tentativa konsiliaun ne'e rekerida no rekeridu konkorda menór nafatin hela ho rekerida menór sira nia inan, rekeridu no rekerida mós konkorda rekeridu mai vizita menór sira nia oan kualker tempu, alende ne'e rekeridu no rekerida konkorda hamutuk atu rekeridu fó alimentasaun ba menór kada fulan US\$ 35.00, osan refere hahu fulan oin manda liu husi rekerida menór sira nia inan nia konta bankaria.

### **Alegasaun finál**

Prokuradór representa menór no defeza husu ba tribunál atu omologa akordu ne'ebé parte rua konkorda ona atu tau matan menór.

### **11. Kazu Sivíl regulasaun ba ezersísiu podér paternal**

Nú. Prosesu : 0012/22.CVTDS  
Kompozisaun Tribunál : Singulár  
Juis : Dr. Eusébio Xavier Victor  
Prokuradór : Dr. Rafael Jeronimo Gusmão  
Defeza : Dr. Domingos dos Santos  
Desizau : Omologa dezisténsia keixa

Iha20 Jullu 2022, Tribunál Distritál Suai prezide julgamentu tetativa konsiliaun ba kazu regulasaun ezersísiu podér paternál ne'ebé envolve autór MRCB (idade tinan 1 fulan 10), hasoru rekeridu CL no rekerida ECdJB nu'udar autór (menór) nia inan-aman, iha Munisípiu Covalima.

### **Termu no Fundamentu Sira**

Iha 2021 rekerida no rekeridu iha relasaun namora no rekerida isin rua maibé rekeridu aman la responsabilidade ba bebe ne'ebé iha rekerida nia isin no banhira rekerida partus rekeridu nunka ba vizta no la fó alimentasaun ba menór, nune'e ministériu públiku

representa menor hatama asaun ida ne'e hodi husu rekeridu nia responsabilidade ba menor ninia nesesidade loro-loron nian. Kazu ne'e relaciona ho ezersisiu poder paternal tuir artigu 1757, 1758 (1), 1759, 1762, 1765, 1786, 1787(2), 1782, 1804 no 1805 KS kona-ba responsabilidade inan-aman ba menor sira.

### **Tentativa konsiliaun**

Iha julgamentu tentativa konsiliaun ne'e, rekerida no rekeridu konkorda menor nafatin hela ho rekerida, entretantu ba regime vizita rekerida konkorda keridu libre mai vizita ninia oan no banhira menor hakarak rekeridu bele lori menor ba uma, enkuantu ba regime alimentasaun rekerida deklara katak kada fulan gastu ba menor ninia nesesidade loro-loron kada fulan US\$30.00, alende ne'e rekeridu konkorda no prontu atu fo alimentasaun ba menor kada fulan no hahu fulan Agostu rekeridu komesa transfer ona osan refere liu husi rekerida nia konta bankaria.

### **Alegasaun final**

Prokurador representa menor no defeza husu ba tribunál atu omologa akordu ne'ebé rekeridu no rekerida konkorda hamutuk hodi tau-matan ba menor.

### **Desizaun**

Bazeia ba parte rua nia akordu kona-ba regime guarda, regime vizita no regime alimentasaun, nune'e tribunál konklui no omologa akordu.

### **12. Kazu Sivíl regulasaun ba ezersisiu poder paternal**

Nú. Prosesu	: 0013/22.CVTDS
Kompozisaun Tribunál	: Singulár
Juis	: Dr. Eusébio Xavier Victor
Prokurador	: Dr. Nelson J.S. Magno
Defeza	: Dr. Domingos dos Santos
Desizau	: Omologa dezisténsia keixa

Iha 21 Jullu 2022, Tribunál Distritál Suai prezide julgamentu tentativa konsiliaun ba kazu regulasaun ezersisiu poder paternal ne'ebé envolve autor SPdR (idade tinan 4) hasoru rekeridu/a JdS no AB nu'udar autor/menor nia inan-aman, iha Munisípiu Covalima.

### **Termu no Fundamentu Sira**

Iha Abril 2020, rekeridu sai husi uma fila ba nia inan aman no ikus mai rekeridu no rekerida separa, rekeridu nunca ba vizita menor no la fo alimentasaun ba menor, nune'e prokurador representa menor hatama asaun ne'e hodi nune'e rekeridu atu tau matan ba menor nia nesesidade loro-loron nian. Kazu ne'e relaciona ho ezersisiu poder paternal tuir artigu 1757, 1758 (1), 1759, 1762, 1765, 1786, 1787(2), 1782, 1804 no 1805 KS kona-ba responsabilidade inan-aman ba menor sira.

### **Tentativa konsiliaun**

Iha julgamentu tentativa konsiliaun ne'e, rekerida no rekeridu konkorda menor nafatin hela ho rekerida inan, alende ba regime vizita rekerida konkorda rekeridu libre mai vizita

ninia oan no rekeridu bele lori menór ba ninia uma, rezime alimentasaun rekerida hateten katak kada fulan gasta osan ba menór ninia nesesidade total hamutuk US\$30.00, rekeridu no rekerida konkorda no osan refere manda liu husi rekerida nia konta bankaria hahu husi fulan Agostu.

### **Alegasaun final**

Prokuradór, representa menór no defeza husu ba tribunál atu omoloa akordu ne'ebé rekeridu no rekerida konkorda hamutuk hodi tau-matan ba menór.

### **Desizaun**

Bazeia ba parte rua nia akordu kona-ba regime guarda, regime vizita no regime alimentasaun, nune'e tribunál konklui no omologa akordu.

### **13. Kazu Sivíl regulasaun ba ezersísiu podér paternal**

Nú. Prosesu	: 0026/22.CVTDS
Kompozisaun Tribunál	: Singulár
Juis	: Dr. Eusébio Xavier Victor
Prokuradór	: Dr. Nelson J.S. Gusmão
Defeza	: Dr. Domingos dos Santos
Desizau	: Omologa dezisténsia keixa

Iha 22 Julu 2022, Tribunál Distritál Suai liu husi julgamentu prezide julgamentu tentativa konsiliaun ba kazu regulasaun ezersísiu podér paternal ne'ebé envolve autór JFG (tinan 8) RFG (tinan 6), NFG (tinan 4) no AQFG (tinan 2) hasoru rekeridu/a FG no AF nu'udar autór/ menórsira nia inan-aman, iha Munisípiu Covalima.

### **Termu no Fundamentu Sira**

Iha 18 Marsu 2022, rekridu ho rekerida hirus malu no rekeridu sai husi uma fila ba nia inan aman, to'o agora rekeridu nunka ba vizita menór sira, nune'e prokuradór representa menór hatamaasaun ida ne'e hodi kontra rekeridu no rekerida.

Kazu ne'e relasiona ho ezersísiu podér paternal tuir artigu 1757, 1758 (1), 1759, 1762, 1765, 1786, 1787(2), 1782, 1804 no 1805 KS kona-ba responsabilidade inan-aman ba menór sira.

### **Tentativa konsiliaun**

Iha tentativa konsiliaun ne'e rekeridu no rekerida konkorda menór nafatin hela ho rekerida (inan), rekerida konkorda rekeridu bele mai vizita menór iha tempu ne'ebé rekeridu mai vizita menór, rekerida hateten katak kada fulan gasta osan ba menór US\$ 100.00. Tribunál esplika ba rekeridu no rekerida kona-ba alimentasaun ne'e interese menór nian tanba ne'e prokuradór repereza menór hatama asaun ne'e la'os kontra de'it rekeridu maibé inan ho aman hotu, tanba ne'e osan ne'ebé rekrida dehan US\$100.00 ne'e la'os rekeridu de'it mak atu responsabeliza mesak maibé rekerida mós responsabel pursentu 50 no rekeridu aman pursentu 50, , no rekeridu mós konkorda kada fulan prontu atu fó alimentasaun ba menór US\$50.00, osan refere hahú fulan oin sei transfere liu husi rekerida nia konta bankaria.



## **Alegasaun finál**

Prokuradór representa menór no defeza husu ba tribunál atu omoloa akordu ne'ebé rekeridu no rekerida konkorda hamutuk atu tau-matan ba menór.

## **Desizaun**

Bazeia ba parte rua nia akordu kona-ba regime guarda, regime vizita no regime alimentasaun, nune'e tribunál konklui no omologa akordu.

## **14. Kazu Sivíl regulasaun ba ezersísiu podér paternal**

Nú. Prosesu	: 0084/18.CVTDS
Kompozisaun Tribunál	: Singulár
Juis	: Dr. Eusébio Xavier Victor
Prokuradór	: Dr. Rafael Jeronimo Gusmão
Defeza	: Dr. Angelmo Pinto
Desizau	: Omologa dezisténsia keixa

Iha 22 Jullu 2022, Tribunál Distritál Suai liu husi julgamentu prezide julgamentu tentativa konsiliausaun ba kazu regulasaun ezersísiu podér paternál ne'ebé envolve autór JMC (tinan 12) no CDA (idade tinan 8) hasoru rekeridu AM no NAC nu'udar autór nia inan-aman, iha Munisípiu Covalima.

## **Termu no Fundamentu Sira**

Iha Abril 2019, rekeridu ho rekerida iha dezentendimentu, rekeridu deskonfia rekerida amante ho mane seluk. Rekeridu sai husi uma fila ba nia inan aman no ba vizita no la fó alimentasaun ba menór sira, prokuradór representa menór hatama asaun kontra rekeridu no rekerida.

Rekeridu serbisu hanesan funsionáriu kontratadu iha ministériu solidariedade sosiál ho saláriu \$ 343.00. Kazu ne'e relasiona ho ezersísiu podér paternál tuir artigu 1757, 1758 (1), 1759, 1762, 1765, 1786, 1787(2), 1782, 1804 no 1805 KS kona-ba responsabilidade inan-aman ba menór sira.

## **Tentativa konsiliausaun**

Iha tentativa konsiliausaun ne'e rekerida hatete katak menór nain rua ne'e hela ho rekerida, maibé rekeridu hatete katak rekerida bosok rekeridu no rekerida agora hola mane seluk iha Ogues no sira nia oan menór nain rua hela ho sira nia avo, tanba ne'e rekeridu hakarak menór nain rua ba fali hela ho rekeridu.

Tribunál tenta atu omologa rezime guarda no parte rua la konkorda. Mesmu nune'e iha loron tuir mai rekeridu no rekerida konkorda no iha loron sabadu dader rekeridu ba lori menór nain rua ba iha ninia uma bainhira rekeridu halo nia tinan rekeridu ba lori menór nain rua ba selebra rekeridu nia tinan nomós menór nia tinan rekeridu ba lori menór selebra menór nia tinan iha ninia uma. Rekeridu no rekerida konkorda atu rekeridu fó alimentasaun ba menóor nain rua ne'e kada fulan US\$70.00, osan refere hahu fulan Agostu sei manda liu husi rekerida nia konta bankaria.

## **Alegasaun finál**

Prokuradór representa menór no defeza husu ba tribunál atu omoloa akordu ne'ebé rekeridu no rekerida konkorda hamutuk atu tau-matan ba menór.

## **Desizaun**

Bazeia ba parte rua nia akordu kona-ba regime guarda, regime vizita no regime alimentasaun, nune'e tribunál konklui no omologa akordu.

## **15. Kazu Sivíl regulasaun ba ezersísiu podér paternal**

Nú. Prosesu : 0001/22.CVTDS  
Kompozisaun Tribunál : Singulár  
Juis : Dr. José Maria de Araujo  
Prokuradór : Dr. Rafael Jeronimo Gusmão  
Defeza : Dr. Albano Maia  
Desizau : Omologa dezisténsia keixa

Iha 22 Jullu 2022, Tribunál Distritál Suai liu husi julgamentu prezide julgamentu tentativa konsiliaun ba kazu regulasaun ezersísiu podér paternál ne'ebé envolve autór/menór sira MdO (tinan 12), IDdR (tinan 9), AJdO (tinan 4) hasoru rekeridu no rekerida HdOA no LG nu'udar autór/menór sira nia inan-aman, iha Munisípiu Covalima.

## **Termu no Fundamentu Sira**

Iha 20 Jullu 2020, rekeridu no rekerida mosu dezentendimentu no rekerida duni sai rekeridu husi uma no rekeridu fila ba nia inan aman no durante ne'e rekeridu nunca mai vizita menór sira no nunca fó alimentasaun, nunee menór sira liu husi prokuradór hatama asaun ne'e hodi kontra rekeridu no rekerida. Kazu ne'e relasiona ho ezersísiu podér paternál tuir artigu 1757, 1758 (1), 1759, 1762, 1765, 1786, 1787(2), 1782, 1804 no 1805 KS kona-ba responsabilidade inan-aman ba menór sira.

## **Tentativa konsiliaun**

Iha tentativa konsiliaun ne'e rekerida hateten katak menór nain tolu ne'e hela ho rekerida, enkuantu rekeridu mós hakarak menór sira atu hela ho rekeridu, maibé bainhira tribunal halo esplikasaun ba sira katak menór sira ne'e tanbatoman liu rekerida nune'e bainhira menór sira ba hela fali iha ambiente foun dalaruma menór sira latoman, ho tribunál nia esplikasaun ne'e rekeridu konkorda menór sira nafatin hela ho menór sira nia inan-rekerida. Entretantu ba rezime vizita rekeridu no rekerida konkorda atu rekeridu ba vizita menór sira iha loron sabadu no domingu no kona-ba selebra menór sira nia aniversariu, ne'e depende ba menór sira nia hakarak. Rekerida deklara katak kada fulan ida gastus ba menór sira ho total US\$75.00. Valór alimentasaun ida ne'e rekeridu hakarak hamenus no kada menór US\$15.00, total US\$ 45.00 no rekerida mós konkorda, nunee hahú fulan Agostu rekeridu sei entrega osan refere diretamente ba oan mane primeiru naran Mesias de Oliveira.

## **Alegasaun finál**

Prokuradór reprezenta menór no defeza husu ba tribunál atu omologa akordu ne'ebé rekeridu no rekerida konkorda hamutuk ona hodi tau-matan ba menór sira.

### **Desizaun**

Bazeia ba parte rua nia akordu kona-ba regime guarda, regime vizita no regime alimentasaun, nune'e tribunál konklui no omologa akordu.

### **16. Krime abuzu seksuál ba menór**

Nú. Prosesu : 0006/21.MFMFI  
Kompostu tribunal : Koletivu  
Juis : Dr. Benjamin Barros, Dr. Samuel da Costa Pacheco no  
Dra. Patricia de Araújo Fatima Barreto Magno Xavier.  
Prokuradór : Dr. Gustavo da Silva  
Defeza : Dr. Domingos dos Santos  
Desizaun : Pena prizaun tinan 8

Iha 22 Jullu 2022, Tribunál Distritál Suai, prizide julgamentu leitura akordaun ba krime abuzu seksuál ba menór ne'ebé envolve arguidu VdS hasoru lezada EPL, iha Munisípiu Manufahe.

### **Akuzasaun prokuradór**

Prokuradór akuza katak iha 27 Maiu 2021, iha oras tuku 8:00 dadeer, lezada aruma hela bikan foer sira atu ba fasi iha dapur, derepente arguidu tama ba dapur laran hakuak lezadu husi kotuk no nata lezada nia hasan no kaer lezada hirus matan parte rua, lezada sente hakfodak, tauk no hakilar dehan '*hau lakohi, hau lakohi*, maibé arguidu kontinua hakuak metin lezada no aproveita kaer lezada nia orgaun seksuál. Tuir mai lezada hisik aan husi arguidu no hatete ba arguidu katak hau ba kesar ama, maibé arguidu hatan lalika ba kesar ba ama nonok de'it. Lezada tanis no halai ba kesar iha viziñu sira.

Prokuradór akuza arguidu kontra artigu 177 KP nu 2 kona-ba abuzu seksuál ba menór ho moldura penál tinan 5 to'o tinan 15.

### **Produsaun ba prova sira**

Iha prosesu julgamentu arguidu deklarata katak faktu balun loos no balun la loos, arguidu hakuak duni lezada maibé husi oin no rein lezada nia hasan no kaer lezada nia orgaun seksuál husi kalsa leten de'it, maibé arguidu la kaer lezada nia hirus matan. Arguidu deklarata katak foin primeiravéz mai hatan iha tribunál.

Alende ne'e, lezada kontinua konfirma faktu hotu iha akuzasaun no deklarata katak sente moe.

### **Alegasaun finál**

Prokuradór, haktuir katak arguidu konfesa parsialmente ba faktu iha akuzasaun, mesmu arguidu konfesa parsial maibé lezada mai kontinua konfirma faktu sira hotu iha akuzasaun. Tanba ne'e, husu tribunál atu kondena arguidu deside tuir konviksaun tribunál nian.

Entretantu, defeza haktuir katak iha julgamentu arguidu konfesa parsialmente no lezada kontinua konfirma faktu sira iha akuzasaun, nune'e husu ba tribunál atu kondena arguidu tuir konviksaun tribunál nian.

### **Desizaun**

Tribunál koletivu delibera no halo altersaun kualifikasaun subtansia tuir artigu 275 KPP aumenta agravaasaun tuir artigu 182, tanba bainhira konfirma lezada nia Sertidaun Batismu lezada foin idade tinan 11 loron 14. Kona-ba alterasaun ne'e parte sira la iha opozisaun.

Depoisde avalia faktu sira hotu, tribunál prova katak arguidu nata lezada nia hasan, kaer lezada nia hirus matan no kaer lezada nia orgaun seksuál. Bazeia ba faktu provadu sira ne'e no tetu mós sirkuntansia sira hotu ne'ebé haleu krime, nune'e tribunál konklui prosesu ne'e no kondena arguidu ho pena prizaun tinan ualu.

### **17. Krime ofensa ba integridade fizika simples natureza violénsia doméstika**

Nú. Prosesu : 0020/21.BBBLB  
Kompozisaun tribunal : Singulár  
Juis : Dr. Samuel da Costa Paicheco  
Prokuradór : Dr. Rafael Jeronimo Gusmão  
Defeza : Dr. Angelmo Pinto  
Desizaun : Pena prizaun tinan 1 suspende tinan 1

Iha 22 Jullu 2022, Tribunál Distritál Suia preside julgamentu leitura sentensa ba krime ofensa ba integridade fizika simples ho natureza violénsia doméstika envolve arguidu JdCM hasoru nia feen MdJTC, iha Munisípiu Bobonaro.

### **Akuzasaun prokuradór**

Prokuradór akuza katak iha 04 Setembru 2021, iha oras tuku 12:30 meiodia, arguidu buti lezada nia kakorok, basa dala rua iha hasan parte karuk no parte loos, tuku dala barak iha lezada nia ulun no tuku dala rua iha kotuk laran no lezada tenta atu halai sai hodi husu ajuda ba ema seluk, maibé arguidu halai tuir ka'er lezada basa dala ida iha lezada nia hasan parte loos no tuku tan dala ida iha kotuk laran no ka'er lezada nia bluzas hodi rasta lezada ba uma no kontinua tuku dala tolu iha ulun no tebe dala lima iha kidan rezulta moras iha kotuk laran, ulun no kidan. Antes ne'e arguidu daan hela *supermi* iha dapur no arguidu tama ba uma laran atu foti bikan maibé lezada peel hela no arguidu tama de'it nune'e lezada nerboju foti peel ne'e baku dala ida iha lezada nia kabaas, nune'e arguidu nerboju no komete krime hirak ne'e hasoru lezada.

Prokuradór akuza arguidu kontra artigu 145 KP kona-ba ofensa integridade fizika simples ho moldura penál tinan 3 ka multa konjuga ho artigu 2, 3 (b) 35, (b) no 36 LKVD.

### **Produsaun ba prova sira**

Iha prosesu julgamentu, arguidu konfesa integralmente ba faktu hotu iha akuzasaun no deklara katak depoisde akontesimentu sira hela ketak no liu fulan ida sira rua di'ak malu

fali to'o ohin lora, arguidu deklara arrepende nia hahalok, foin primeiravés mai hatan iha tribunál no promete sei labaku tan lezada.

Alende ne'e, lezada kontinua konfirma faktu hotu iha akuzasaun no deklara katak mesmu di'ak malu ona ho arguidu maibé arguidu nafatin halo presaun psikologia hasoru lezada, nune'e lezada hakarak atu moris separa ho arguidu.

### **Alegasaun finál**

Prokuradór, haktuir katak arguidu provadu komete krime hasoru lezada ne'ebé arguidu rasik konfesa no konfirma husi lezada, ho nune'e husu ba tribunál atu kondena arguidu ho pena suspensaun.

Entretantu defeza haktuir katak husu ba tribunál atu fó justisa ba arguidu.

### **Desizaun**

Depoisde avalia faktu sira hotu, tribunál prova katak arguidu provadu komete krime ofensa ba integridade fizika simples ho natureza violénsia doméstika hasoru lezada.

Bazeia ba faktu provadu hirak ne'e no tetu mós sirkunstánsia sira hotu nune'e tribunál konklui kondena arguidu ho pena prizaun tinan ida suspende ba tinan ida.

### **18. Krime ofensa ba integridade fizika simples ho natureza violénsia doméstika**

Nú. Prosesu	: 0199/20.BBMLV
Kompozisaun Tribunál	: Singulár
Juis	: Dr. Benjamin Barros
Prokuradór	: Dr. Rafael Jeronimo Gusmão
Defeza	: Dr. Angelmo Pinto
Desizaun	: Pena multa

Iha 25 Jullu 2022, Tribunál Distritál Suai prezide julgamentu leitura sentensa ba krime ofensa ba integridade fizika simples ho natureza violénsia doméstika envolve arguidu LCdD hasoru nia feen LC, iha Munisípiu Bobonaro.

### **Akuzasaun prokuradór**

Prokuradór akuza katak iha 04 Novembru 2021, iha oras tuku 15:00 lokraik, lezada nia banin fetu fó osan ba arguidu atu sosa lezada nia vistidu, arguidu simu tiha osan refere no lori ba sosa fali *bluetooth speaker*, ho nune'e lezada no arguidu komesa diskute malu no arguidu nerbozu buti lezada nia kakorok, basa dala ida hasan parte loos no tebe dala ida iha kidan parte loos rezulta lezada moras iha kidan no bubu hasan.

Prokuradór akuza arguidu kontra artigu 145 KP kona-ba ofensa integridade fizika simples ho moldura penál tinan 3 ka multa konjuga ho artigu 2, 3 (b) 35, (b) no 36 (LKVD).

### **Produsaun ba prova sira**

Iha prosesu julgamentu arguidu konfesa integralmente ba faktu sira hotu iha akuzasaun no deklara katak depoisde akontesimentu liu lora ida arguidu husu deskulpa kedan ba

lezada no lezada mós perdua arguidu no to’o agora la iha problema seluk, arguidu deklara tan katak foin primeiravés hatan iha tribunál, promete sei labaku lezada. Arguidu hanesan motorista mikrolete ho fensimentu US\$125.00,

Alende ne’e lezada kontinua konfirma faktu sira iha akuzasaun no reforsa liu tan katak depoisde akontesimentu arguidu rasik husu deskulpa no lezada mós perdua ona arguidu nia hahalok.

### **Alegasaun finál**

Prokuradór, haktuir katak arguidu provadu komete krime hasoru lezadatuur akuzasaun, arguidu raik konfesa no konfirma husi lezada, maibé prokuradór haree katak krime violénsia doméstik aas tebes, nune’e husu ba tribunál atu kondena arguidu ho pena prizaun fulan tolu suspende ba tinan ida.

Entretantu, defeza husu ba tribunál atu fó justisa ba arguidu, bazeia ba sirkuntansia sira ne’ebé produs iha julgamentu.

### **Desizaun**

Depoisde avalia faktu sira hotu, tribunál prova katak arguidu komete krime ofensa ba integridade fizika simples ho natureza violénsia doméstika. Bazeia ba faktu provadu sira ne’e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál no agora di’ak malu ona, nune’e tribunál konklui prosesu ne’e no kondena arguidu ho pena multa US\$ 60.00, arguidu sei selu kada loron US\$1.00 durante loron 60 bainhira arguidu la selu pena multa refere, arguidu sei kumpri prizaun alternativa loron 40.

### **19. Krime Ofensa ba Integridade fízika simples**

Nú. Prosesu	: 0004/18. MFFBL
Kompostu tribunal	: Singulár
Juis	: Dr. Benjamin Barros
Prokuradór	: Dr. Rafael Jerónimo Gusmão
Defeza	: Dr. Domingos dos Santos
Desizaun	: Omologa dezistencia keixa

Iha 26 Jullu 2022, Tribunál Distritál Suai, prizide julgamentu tentativa konsiliausaun ba krime ofensa ba integridade fízika simples envolve arguida Maria de Jesus no Melania de Almeida hasoru lezada Maria da Costa Albino, iha Munisípiu Manufahe.

### **Akuzasaun prokuradór**

Prokuradór akuza katak iha 30 Setembru 2021, iha oras tuku 9:00, iha kota lama suku Leolima postu Administrativu Hatudo, arguida sira kaer lezada hodi rasta halo monu tun ba rai, resulta liman sikun rua hetan kanek, depois arguida Maria sama lezada nia kabun, tuku dala rua lezada nia ren-toos, tuir mai arguida Milena lees makaas lezada nia liman no kotuk laran resulta kanek no ran sai. Hafoin arguida sira halo *video* hodi hatete ba lezada katak *‘hadau ema nia la’en tenke halo hanesan ne’e mak di’ak, feto bonita same hadau ema nia laen’*.

Prokuradór akuza arguida sira kontra artigu 145 KP kona-ba ofensa ba integridade fizika simples ho moldura penál tinan 3 ka multa.

### **Produsaun ba prova sira**

Bazeia ba artigu 262 nú.1 KPP kona-ba tentativa ba konsiliaun, nune'e antes tama ba julgamentu produsaun ba prova, juis husu halo tentativa konsiliaun ba lezadu ho arguidu sira.

Antes ne'e parte sira dame malu ona tuir lisan, nune'e ohin mai atu deziste de'it prosesu. Alende ne'e arguida nain rua promete sei la repete hahalok ne'e hasoru lezada inklui ema seluk.

### **Alegasaun finál**

Prokuradór ho defeza apresia akordu dame malu ne'ebé parte rua decide ona no husu ba tribunál atu omologa prosesu ne'e.

### **Desizaun**

Bazeia ba akordu dame husi parte rua no pedidu dezisténsia keixa husi lezadu. Nune'e bazeia ba artigu 262 KPP, tribunál konklui prosesu ne'e no omologa akordu pedidu dezisténsia keixa ho kondisaun katak arguidu sira labele repete tan hahalok ne'e iha futuro, nune'e tribunál konklui prosesu ne'e no absolve arguidu sira.

### **20. Kazu Sivíl regulasaun ba ezersíiu podér paternal**

Nú. Prosesu	: 0171/17.CVTDS
Kompozisaun Tribunál	: Singulár
Juis	: Dr. Eusébio Xavier Victor
Prokuradór	: Dr. Rafael Jeronimo Gusmão
Defeza	: Dr. Domingos dos Santos
Desizau	: Omologa dezisténsia keixa

Iha 27 Jullu 2022, Tribunál Distritál Suai prezide julgamentu tentativa konsiliaun ba kazu regulasaun ezersíiu podér paternál ne'ebé envolve autór/menór RRdJ idade tinan 9 no JdJ idade tinan 6 hasoru rekeridu/a CdS no rekerida SdJ, iha Munisípiu Covalima.

### **Termu no Fundamentu Sira**

Iha 2017, rekeridu no rekerida iha dezentendimentu no rekeridu decide sai husi uma fila ba nia inan aman no depoisde ida ne'e rekeridu la ba vizita menór nain rua no la fó alimentasaun ba menór, nune'e prokuradór representa menór hatama asaun ida ne'e hodi nune'e rekeridu atu fó alimentasaun ba menór nain rua.

Kazu ne'e relaciona ho ezersíiu podér paternál tuir artigu 1757, 1758 (1), 1759, 1762, 1765, 1786, 1787(2), 1782, 1804 no 1805 KS kona-ba responsabilidade inan-aman ba menór sira.

### **Tentativa konsiliaun**

Iha tentativa konsiliaun ne'e rekeridu no rekerida konkorda menór nafatin hela ho rekerida (menór sira nia inan), rekerida konkorda rekeridu mai vizita menór iha tempu sabadu dadeerno lori menór nain rua ba uma depois lora domingo lokraik entrega fali menór nain rua ba rekerida. Alende ne'e bainhira menór selebra sira nia tinan ka menór sira nia aman mak selebra nia tinan rekeridu nafatin bele lori menór ba uma. Kona-ba rejime alimentasaun, rekerida dehan katak kada fulan gasta ba menór nian US\$ 50.00. hafoin tribunál esplika kona-ba oinsa atu fó alimentasaun ba menór.

Tribunál hateten katak total osan alimentasaun US\$50.00 ne'e sei responsabiliza husi menór sira nia inan-aman, ne'ebé rekeridu sei responsabiliza hodi fó osan US\$25.00 nune'e mós rekerida sei responsabiliza hodi fó osan US\$25.00 ba menór sira. Rekeridu no rekerida sira konkorda hahú husi fulan Agostu osan alimentasaun ba menór sira ne'e sei transfere liuhusi rekerida nia konta bankaria.

### **Alegasaun finál**

Prokuradór representa menór no defeza husu ba tribunál atu omoloa akordu ne'ebé rekeridu no rekerida konkorda hamutuk atu tau-matan ba menór.

### **Desizaun**

Bazeia ba parte rua nia akordu kona-ba regime guarda, regime vizita no regime alimentasaun, nune'e tribunál konklui no omologa akordu.

### **21. Kazu Sivíl regulasaun ba ezersísiu podér paternal**

Nú. Prosesu	: 0089/21.CVTDS
Kompozisaun Tribunál	: Singulár
Juis	: Dr. José Maria de Araujo
Prokuradór	: Dr. Nelson J.S. Magno
Defeza	: Dr. Escolastico da Costa Nunes Maia
Desizau	: Omologa dezisténsia keixa

Iha 27 Jullu 2022, Tribunál Distritál Suai prezide julgamentu tetativa konsiliaun ba kazu regulasaun ezersísiu podér paternál ne'ebé envolve autór/menór MO (idade tinan 1) hasoru rekeridu/a JTS no DSdJ nu'udar nia inan aman, iha Munisípiu Covalima.

### **Termu no Fundamentu Sira**

Iha 2021, rekeridu no rekerida iha deskonfia rekerida amante ho mane seluk, nune'e família rua tuur hamutuk hodi resolve problema ne'e maibé la iha solusaun, ikus mai sira separa, durante sira sepra rekeridu nunca ba vizita menór no la fó alimentasaun ba menór to'o ohin lora. Prokuradór representa menór hatama asaun ne'e hodi husu rekeridu atu fó alimentasaun ba menór.

Kazu ne'e relasiona ho ezersísiu podér paternál tuir artigu 1757, 1758 (1), 1759, 1762, 1765, 1786, 1787(2), 1782, 1804 no 1805 KS kona-ba responsabilidade inan-aman ba menór sira.

### **Tentativa konsiliaun**



Rekerida deklara katak, agora dadaun ne'e menór hela ho rekerida, rekeridu konkorda menór nafatin hela ho rekerida, rekerida no rekeridu konkorda rekeridu ba vizita menór iha tempu ne'ebé rekeridu atu ba vizita, kona-ba aniversariu menór nian depende rekeridu no rekerida nia konkordansia, rekerida deklara katak fulan ida gasta ba menór nia nesesidade US\$50.00, maibé deklara katak ho valór hanesan ne'e rekeridu la iha kbi'it, rekeridu hakarak fó osan ho valór US\$15.00 ba menór, alende ne'e rekerida mós konkorda no osan refere sei manda hahu husi fulan Agostu no entrega osan refere ba rekerida iha eskuadra PNTL Maubise.

### **Alegasaun finál**

Prokuradór representa menór no defeza husu ba tribunál atu omoloa akordu ne'ebé rekeridu no rekerida konkorda hamutuk atu tau-matan ba menór.

### **Desizaun**

Bazeia ba parte rua nia akordu kona-ba regime guarda, regime vizita no regime alimentasaun, nune'e tribunál konklui no omologa akordu.

### **22. Krime ofensa ba integridade fizika simples natureza violénsia doméstika**

Nú Prosesu : 0029/20.ANANV  
Kompozisaun tribunal : Singulár  
Juis : Dr. Benjamin Barros  
Prokuradór : Dr. Nelson J.S. Magno  
Defeza : Dr. Domingos dos Santos  
Desizaun : Pena Multa

Iha 28 Jullu 2022, Tribunál Distritál Suia prezide julgamentu leitura sentensa ba krime ofensa ba integridade fizika simples ho natureza violénsia doméstika envolve arguidu CCB hasoru nia feen LdS, iha Munisípiu Ainaro.

### **Akuzasaun prokuradór**

Prokuradór akuza katak iha 19 Outobru 2020, iha oras tuku 10:00 dadersan, arguidu tebe dala ida iha lezada nia kotuk laran. antes ne'e arguidu haruka lezada atu labele ba serbisu, lezada ho arguidu diskute malu, arguidu nerboju no komete krime ne'e hasoru lezada.

Prokuradór akuza arguidu kontra artigu 145 KP kona-ba ofensa integridade fizika simples ho moldura penál tinan 3 ka multa konjuga ho artigu 2, 3 (b) 35, (b) no 36 (LKVD).

### **Produsaun ba prova sira**

Iha prosesu julgamentu, arguidu konfesa faktu iha akuzasaun no deklara katak arrepende ninia hahalok katak baku ninia feen ne'e ladi'ak, depoisde akontesimentu liu loron rua di'ak malu kedan no agora hela hamutuk nafatin, arguidu deklara tan foin primeiravés hatan iha tribunál no promete katak sei larepete hahalok ne'e hasoru lezada, arguidu deklara liu tan katak hanesan mestri kontratadu kada fulan simu salariu US\$ 280.00. Alende ne'e lezada kontinua konfirma faktu iha akuzasaun no reforsa katak depoisde

akontesimentu to'o agora arguidu labaku ona lezada, di'ak malu no agora dadaun ne'e hamutuk nafatin.

### **Alegasaun finál**

Prokuradór, haktuir katak arguidu komete krime ofensa integridade fizika simples ho forma violénsia doméstka hasoru lezada nu'udar nia feen ne'ebé arguidu konfesa no konfirma husi lezada, prkuradór haree katak depoisde akontesimentu sira la iha ona problema seluk no arguidu hanesan funsionáriu kontratadu tanba ne'e prokuradór husu ba tribunál atu kondena arguidu ho pena multa atu nune'e labele inplika ba arguidu nia serbisu.

Entretantu, defeza haktuir katak, arguidu konfesa, arrepende ninia hahalok no depoisde akontesimntu sira la iha ona problema seluk, nune'e husu ba tribunál atu kondena arguidu ho pena admoestasaun.

### **Desizaun**

Depoisde avalia faktu sira hotu, tribunál prova katak arguidu komete krime ofensa ba integridade fízika simples hasoru lezada nu'udar nia feen. Bazeia ba faktu provadu no tetu mós sirkunstánsia agravante katak kazu violénsia doméstika aas tebes iha fatin hotu, maibé tribunál tetu mós sirkunstansia atenuante hanesan arguidu foin primeiravés mai hatan iha tribunál, arrepende nia hahalok no depoisde akontese la iha problema seluk, nune'e tribunál konklui prosesu no kondena arguidu ho pena multa US\$ 60.00, ne'ebé arguidu sei selu kada lora ida US\$ 1.00 durante lora 60. Tribunál mós aplika pena alternativa lora 40 prizaun bainhira arguidu la selu pena multa refere.

### **23. Krime ameasa**

Nú. prosesu	:0036/21.PDSUA
Kompozisaun Tribunál	: Singulár
Juis	: Dr. Benjamin Barros
Prokuradór	: Dr. Rafael Jeronimo Gusmão
Defeza	: Dr. Domingos dos Santos
Desizaun	: Omologa no dezistencia keixa

Iha 29 Jullu 2022, Tribunál Distritál Suai prezide julgamentu tentativa konsiliausaun ba krime ameasa, arguida Natalia Martins hasoru lezadu nu'udar eis katuas oan Mario da Costa, iha Munisípiu Covalima.

### **Akuzasaun prokuradór**

Prokuradór akuza katak iha 08 Abril 2021, iha oras tuku 21:33 kalan arguida ameasa lezadu liu husi SMS hateten katak *'aban hau toman ó iha merkadu ó leva katana mak depois hau ba Becora. Ó hola tiha fetu seluk ó haruka ó nia feen oan trata lisuk hau. Arguida nafatin ameasa lezadu hateten katak "se karik ita mak viziñu karik, oras ne'e ó nia uma ahi suhar tiha ona.*

Prokuradór akuza arguida kontra artigu 157 KP kona-ba ameasa ho moldura penál tinan 2 ka multa.

**Produsaun ba prova sira**

Antes tama ba produsaun prova sira, tribunál bazeia ba artigu 262 KPP kona-ba tentativa konsiliaun ba kazu sira ho natureza semi públiku.

Antes ne'e arguida ho lezadu dame malu ona tuir lisan Suai nian, nune'e lezadu mai tribunál atu diziste ninia keixa hasoru arguida. Alende ne'e arguida mós promete sei larepete ninia hahalok hirak ne'e hasoru lezadu. Karik futuru arguida repete ninia hahalok ne'e, arguida prontu simu desizaun husi tribunál ne'ebé todan.

**Alegasaun finál**

Prokuradór no defeza husu ba tribunál atu omologa akordu dame ne'ebé arguidu ho lezadu konkorda ona antes.

**Desizaun**

Bazeia ba lezadu ninia dexistensia keixa, tribunál omologa parte rua nia akordu dame no absolve arguidu.

**Atu hetan informasaun liutan favór kontaktu:**

Ana Paula Marçal

Diretora Ezekutiva JSMP

Telefone: 3323883/77040735

Diresaun e-mail: [ana@jsmp.tl](mailto:ana@jsmp.tl)

[info@jsmp.tl](mailto:info@jsmp.tl)

Website: <http://jsmp.tl>